




ՍՈՒՐԵՆ ԴԱՆԻԵԼՅԱՆ

Բանասիրական գիտությունների թեկնածու

ՀՈԳԵՎՈՐ ԲԱՆԱՍՏԵՂԾՈՒԹՅԱՆ ԾԱՆԱՊԱՐՀԸ

Եկեղեցու ճանաչված գործչի համար բանաստեղծությունը հոգևորությունից ելք փնտրելու վարժանք չէ, ինչպես ժամանակին վարվում էին Մխիթարյան միաբանության գիտնական արերը՝ առօրյա խճողումներից դիմելով սիրողական «զբոսանքների»։ Այս պարագայում Ներսես արքեպիսկոպոս Պողապալյանի բանաստեղծական որոնումները հետամտում են կյանքի օրինաչափ երևույթների գնահատությանը, երբ ամեն ինչ վերստուգվում է աստվածայինի ավագանում, երբ խղճմտանքի ու հավատի ձայնը տիրապետում է աշխարհիկ բազմաձայնության մեջ։ Անտարակույս, այս մտայնության թելադրությամբ է նա ընտրել անպաճույճ ու անհավակնոտ «Ներսես Վանական» գրչանունը։

Երևույթը չի կարելի, ինչ խոսք, բացատրել միայն կրոնական ճանաչողությամբ։ Հարկ է արդեն հիշատակել «հոգևոր» բառի լայնալիր իմաստները, որոնցով ողողվում են մեր ներաշխարհի բոլոր զգացումները, որոնք չեն հանգում միայն եկեղեցական հասկացողության։

Ներսես արքեպիսկոպոս Պողապալյանի կենսագործունեությունը եղել և մնում է հայոց առաքելական եկեղեցուն անմնացորդ ծառայության օրինակ։ Տասը տարի շարունակ, 1982-ից ի վեր, նա Մայր Աթոռ Սուրբ Էջմիածնի դիվանապետն է, որն իրագործում է միաբան համախումբ քաղաքականություն։ Ծնվել է 1937-ին պատմական Կիլիկիայում, գաղթել Բեյրութ, ուր հաճախել է Նուպարյան ազգային վարժարան։ Անթիլիասի Դրեվանքը նրան մեկընդմիջտ կապում է աստվածայինի խորհրդին։ Եվ պատահական չէ, որ քսանամյա հասակում ներգաղթելով Հայաստան՝ Ն. Պողապալյանը ուսումը շարունակում է Մայր Աթոռի հոգևոր ճեմարանում, որից հետո կատարելության ձգտումով հասնում Անգլիա և Շվեյցարիա՝ աստվածաբանության հիմնարար կրթություն ստանալով «Հարության քոլեն»-ում, այնուհետև՝ Ժնևի Էկումենիկ ինստիտուտում։ Էջմիածին վերադարձից հետո նրան վրստահում են հոգևոր ճեմարանի տեսչի աշխատանքը, սակայն որոշ ժամանակ

անց Կաթողիկոսը նրան նշանակում է Ծվեյցարիայի հայոց թեմի հոգևոր հովիվ: Ծուռով նրան կարելի էր արդեն տեսնել ամպամած Ալբիոնում՝ որպես հայ առաքելական Եկեղեցու Անգլիայի թեմի առաջնորդ: 1983-ից ի վեր Եկեղեցիների համաշխարհային խորհրդի կենտրոնական մարմնի անդամ է:

Այսօր նորագույն բանաստեղծությանը ներհատուկ է բարդություններն անընդմեջ հոսքով ընթերցողին «հանձնելու» միտումը, խնդումը հոգնեցնելու չափ ու աստիճանով «վարպետություն» համարելը. որքան գլխապտույտ ու գահավեժ արագությամբ հաջորդեն պատկերակառույցները, որքան խորթին ու մթամած լինեն նրանք, երբ ընթերցողը հանուքը որսում է ոչ թե գեղեցիկի շփումից, այլ բանաստեղծական պատկերները որոշակի տեխնիկական «իմացության» շնորհիվ ճանաչելու ընդմեջեն,—այնքան, չգիտես ինչու, մեծ է թվում քերթվածի գեղագիտական արժանիքը: Սակայն բանաստեղծական պարզությունը երբեք էլ հակընթաց դատողության չի հանգում:

Ընդհակառակը, Ներսես Վանականը գիտակցորեն ընտրելով պարզ բանաստեղծության տիրույթը՝ ճշտում է և իր վերաբերմունքը, «սպառված» ենթածանրի նոր հնարավորությունների նկատմամբ ունեցած հավատը:

— Հին ու սիրած իմ երգերից դուք գիտե՞ք,—

առնորդաբար՝ Հարցրի՛ ես անցորդներին փողոցի.

Դառն ժպտացին, անպատասխան գնացին,

Սիրտս մնաց ցուրտ գիշերվա ճամփեքին:

Իբր սփոփանք՝ հին օրերից անթելված

միայն մի կայծ ջերմացնում է իմ հոգին:

Սա թերևս հիշատակված «տեխնիկական» պակաս դժվարություններ չունի: Այստեղ ագուցվում են պատկերների վճիտությունը, բանաստեղծական թեմայի խորունկ նպատակը՝ գլխավոր կիզակետից բխող պահանջին. պարզապես մատուցվում է մատչելիության սկզբունքով, նրան չեն խառնվում այլազան, կողմնակի խնդիրներ: Երգի պարզությունը բանաստեղծական պացքի վկայությունն է.

Ծարականների, տաղ ու գանձերի

Երգով եմ ուզում երկինք բարձրանալ

Եվ իմ երգի մեջ ուզում եմ դնել

Իմ ողջ էությունն ու անէանալ:

Ի՞նչ զգլխիչ է լինել հանդիման

Կյանքի արարչին այս սուրբ տաճարում,

Թոթափել այստեղ փառքի ցնցոտին,

Մանկանալ, պարզվել ու պայծառանալ:

Ն. Վանականը հրապարակ է հանել բանաստեղծական մի քանի ժողովածուներ՝ «Տեսիլք Յալեթական» (Վենետիկ—Ս. Ղազար, 1989), «Հավերժ պատարագ» (Վենետիկ—Ս. Ղազար, 1990), «Ավանդ հավերժական» (Ս. Էջմիածին, 1990), «Քնար հովվական» (Ս. Էջմիածին, 1991): Վերնագրերն արդեն բացահայտորեն հուշում են բանաստեղծությունների կրոնարմատ ուղղությունը: Աստվածաշնչյան և ազգային-կրոնական երգերը գեղար-

վեստական թարմ մեկնաբանումներով կազմում են սովորական վերջին առավել ամբողջական ժողովածուի մեջ, ուր գետեղված են հեղինակի՝ վերջին տարիներին գրված լավագույն ստեղծագործությունները:

Ուշագրավ է «Քնար հովվական» գրքի մեջ բանաստեղծի բացած գեղարվեստական ընկալման հոգևոր «պատուհանը», գեղագիտական այն չափակշիռը, որով հասու ենք դառնում ներքին այրման ճյուղավորումներին: Այս իմաստով ծրագրային պիտի դիտել «Սակավ ընտրյալք» բանաստեղծությունը, որով եզրափակվում է ժողովածուն, ուր բանաստեղծական խոսքը ճանաչվում է որպես «անբառ աղոթք», «ուխտի կոթող», պարզ մարդուն՝ Անհունի հետ՝ «հավերժ կյանքին կապող օղակ»: Այսպիսով, բանաստեղծությունը, լինելով հանդերձ «երկինք բարձրացած պաղատանք», չի ներփակվում սոսկ եկեղեցական «տարածքում», այլ բացվում է հավատավոր աշխարհին՝ միահյուսելով հոգևոր և աշխարհիկ բաց դռները: Մեր կարծիքով, այստեղ պիտի որոնել Ն. Վանականի գեղարվեստական աշխարհի դիմորոշ հատկությունը, նրա ստեղծագործության՝ աշխարհին պարզված ավազանը: «Հովվական» սահմանման մեջ նախորոշված է արդեն հոգևոր-բանաստեղծ-առաջնորդը, իսկ «քնարը» այն ազնիվ հոգեկանն է, որին մղվում է ընթերցողը, ինչպես հավատացյալը՝ իր ոգեկազմ ընտրյալին:

Աստծո և աստվածայինի թեման Ներսես Վանականի ստեղծագործական տարերքն, է. հետևելով միջնադարյան տաղերգուների կառուցողական շարքերին, հոգևոր երգերի, շարականների ավանդական մոտիվներին՝ նա Աստծո կերպարի տակ որոնում է Էության, խորհրդի ակունքը, գոյության իմաստն ու առհավատչյան: Նրա համար ևս կենսական է ճանապարհի ու ճամփորդի իմաստավորումը: Ծանապարհը դեպի Էության խորքը ինքնամաքումն է, սրբացումը, աստվածային հասողությունը, որի հաճախանքը ժամանակի մեջ դույզն-ինչ որսում են միայն բանաստեղծները: Թումանյանական «բարձրից» հսկվող այդ ճանապարհին Ն. Վանականն արժևորում է իր առաքելությունը որպես ճամփորդի պայծառատեսություն: Ծամփորդ, որ թաքմանն է մեր հույզերի, մեր տագնապների: «Ռեքվիեմ» ստեղծագործության մեջ խորագնա է դառնում «ճամփորդի» մտասևեռումը: Կարճառոտ մեջբերելով Աստծո և աշխարհի քրիստոնեական իմաստալից գրույցը՝ բանաստեղծը փորձում է Ամենաբարձրյալին հասցնել մեր երկրային թըրթիռները, մեր կորուստների փիլիսոփայությունը, որոնք տարերքի հզորությամբ թափվել են ժողովրդի գլխին: Լավատեսության հորդորը բխում է մարդասիրության անքեն ճանաչումից.

Ուտ՝ մեզ, Տե՛ր, զոհողություն

Ներել նույնիսկ մեր թշնամուն:

«Խոսք երախտիքի» բանաստեղծության մեջ քնարական հերոսը նկատում է և ուրիշ «ճամփորդների», որոնց բարոյական նկարագիրը նախապատրաստել է իր մոտքը, սերմանելով գութի, օրհնության ու զոհաբերության հինավուրց պատգամները: «Փափագ» բանաստեղծությունը նպատակալացորեն բացում է «ճամփորդի» («ճամփորդների») ներաշխարհը, ցույց տալիս բարության հունդը: Այստեղ առանձին ջերմությամբ վերարծարծվում է Վ. Տերյանի հերոսի հայտնի ցանկությունը՝ «Լինեի չորան սարերում էն սեզ», սական՝ ժամանակի ու միտումի ընդգծված յուրահատկությունը Ն. Վանականի մոտ որոշակի է: Սիրո հովվերգությանը գալիս է փոխարինելու հո-

գևոր բարոյականությունը՝ շաղախված աշխատանքի, բնապաշտության, սրտի պարզության փառաբանումներին: Արդար աշխատանքից հոգնաբեկ՝ հերոսը աղոթաբանում աստվածային խորհրդով լեցուն լույս է սփռում, որովհետև այլևս աստվածահաճո է ինքը: Քրիստոնեական հրաշքի ճանաչումը տրվում է ինքնաբուխ, սակայն ոչ մեկուսի, այլ նպատակասլացությամբ, դասական պոեզիայի դասերի հետևողությամբ: Քրիստոնեականը մարդասիրության բաց դուռն է, և պատահական չէ, որ այն կապվում է Մ. Մեծաբեկի, Հովհ. Թումանյանի բանաստեղծ համակարգի՝ «անանձնականի»՝ լույս տալով սպառվելու հումանիստական թեզին, որի նախնական բարձրագույն օրինակը հենց Հիսուս Քրիստոսն է.

Սարի լանջին, պուրակի մոտ,
Մի հին վանքում ծվարեի,
Առավոտյան աղոթեի
Եվ օրնիբուն աշխատեի:
Մոտի առվից ջուր բերեի,
Ծառ ու ծաղիկ անեցնեի,
Քրտինքս արդար ես թափեի,
Ծիլ ու ծաղկին նոր կյանք տայի:
Երեկոյան՝ խոնջած, դադրած,
Աղոթարան ես մտնեի,
Մոմի նման բոցկլտայի,
Լույս սփռեի, սպառվեի:

Քրիստոնեական թեման Ն. Վանականի բանաստեղծություններում ունի և ազգային տառապանքի զուգակշիռը. «Ավանդ հավերժական» պոեմում, վերաշարադրելով Տրդատի, կույսերի ու Գրիգոր Լուսավորչի գրույցները, հեղինակը այն դիտում է հայոց աշխարհի պաշտպանության ազնիվ մտահոգությամբ: Պոեմի վերջին տունն իր մեջ ամփոփում է բանաստեղծական հետևողական կարևորագույն գաղափարը՝

Ո՛վ հրաշք անճառ, տեսի՛լ դու լուսե,
Օրհնյալ Միամոր Որդի դու, լսե՛
Մեր Լուսավորչի աղերսն անդադար.
«Լե՛ր հայր ու պաշտպան ազգիս դարե-դար»:

Ն. Վանականի բանաստեղծությունները անընդմեջ կրճատում են մարդու և աստվածայինի միջև ձգված տարածությունը. նրա քնարական հերոսը իրեն սահմանազատում է առօրյայի կեղևից, ներքին հաղորդակցման դիմաց համառող աղմուկից, երկրային այն բոլոր հրապույրներից, որոնք կաշկանդում են մարդու ինքնամաքման ներընթացը: Սրա հետևանքով հովվական երգերի գերակշռող մասում հոգևոր-զգայական գործառույթները ձեռք են բերում առաջնային ներկայակ՝ դուրս մղելով առարկայական-կենցաղային մանրամասները: Սա եթե կուգեք՝ հայեցողություն է, սակայն ներծծված հոգու աստվածահաճաչ ավազանում: Նոր, կրոնական հակվածությամբ՝ բանաստեղծությունը վերանում է համամարդկային հիմնի, բարության ու լույսի ակունքի:

Այնուհանդերձ, ստեղծվում է մեծ սպասման և սպասման հանդեպ բանաստեղծի հարցադրում-տարակույսների ներքին դրամատիզմ, որն արդեն անհաղթահարելի է բանաստեղծական պատկերի մեջ, քանի որ քննական հերոսը դեռ չի գտնում ազգային մտահոգությունների բազում պատասխաններ: Նկատվում է, որ Ն. Վանականին չեն բավարարում այն ձևակերպումները, որոնցում առկա են եկեղեցական ավանդապահ հույզերը: Բանաստեղծը դեմ է նաև կրոնական ներազգային մոտիվների «ինֆլյացիային», դեմ է, որովհետև մեկ քայլ է ընդամենը աստվածաշնչային սուրբ պատգամների, հոգևոր-ազգային համադրումների շահարկումից մեզ և իրեն բաժանողը: Ուղղակի նրա համար քրիստոնեությունը բարձրագույն աշխարհայացք է, շահագրգիռ դիրքորոշում, փիլիսոփայական տրվածք, հետո նոր միայն մշակույթի դաշտ:

Բանաստեղծական թեմատիկ ուղղությանը զուգահեռ Ն. Վանականը թափանցում է աշխարհիկ սյուժետային բազմապիստության մեջ: Այստեղ նրա համար սահմանագիծ է դառնում 1988 թվականը՝ իր երկու հիմնարար ճյուղավորումներով: «Քնար հովվական» ժողովածվի մեջ առանձին բաժին է հատկացված ազգային զարթոնքի գեղարվեստական արծարծումներին՝ «Հող հայրենի» խորագրով: Մարտական աշխույժ շեշտերն են այստեղ բնութագրական: Ծավալուն «Հերոսական» ստեղծագործության մեջ մանրամասնորեն վերաշարադրելով ազգային պատմության կեռմանները՝ հեղինակը չի խուսափում գաղափարական հայտնի ուսույցներից: Դրանով նա որոշ չափով վտանգի տակ է դնում գեղարվեստականության տարրը: Սակայն նկատված որոշ ձգձգվածության փոխարեն կարծես նա շահում է պայքարի անկաշկանդ շնչով, որը դառնում է ոգևորիչ ելակետ շարքի մյուս երգերի համար:

Մեր հիշատակած երկրորդ թեման «պարտադրում է» բնությունը: Ավերիչ երկրաշարժը փոխում է բանաստեղծի խաղաղ, ներհուն ոճը: Այն դառնում է կրքոտ, հուզական, միաժամանակ՝ անել ու անընտել ազգակորույս իր խոռվքով: Համաժողովրդական ողբերգական էջը բանաստեղծություն է մտնում նույնքան տարերայնորեն: Տիրոջն ուղղված խոհերը, տագնապները բազում հարցականներ ունեն. իրար են ագուցված ազգային շարժման, նորագույն տարագրության, աղետի, վաղվա օրվա մտորումները: Կրոնական անցյալ դասերը հուշում են Տիրոջ «պատժի» փորձի զուգահեռը: Եվ առանց այլևայլության ծնվում են տվայտալի դատողությունները:

Արհավի՞րք էր սա, թե՞ սև պատուհաս,
 Մեր գլխին եկած այսքան վաղահաս,
 Մեր մեղքը ո՞րն էր, ո՞րն էր մեր հանցանք,
 Տե՛ր, աղե՛տ էր սա, թե՞ սև պատուհաս:

Բանաստեղծության մեջ վերհանված հակադրությունները բնական են արդեն իրենց անբնականությամբ. մի գծին՝ «կյանք, ծիծաղ, խնդություն», մյուսին՝ «մահ, փլատակ, մեռելություն»: Վերնագիրն էլ անհավակնոտ է, զուրկ գեղարվեստական պատկերային պատշաճությունից՝ «Աղետ», և ուրիշ ոչինչ: Ցավի արտահայտությունը նման մոտեցման մեջ ավելի առինքնող է, քանի որ հարվածն, իրոք, սահմոկեցուցիչ է: Անդոհանքին հաջորդում է աշխարհիկ դժգոհությունը, որը, հնչելով պարզ տողերի արանքից, բերում է առաջին հերթին աղետը, «որպես բաժակն այս լեղի» ուղղամիտ խոսք:

Ժողովրդական վերաբերմունքի գնահատությունից հետո միայն Ն. Վանականը անցնում է խոհերի «աստվածատուր» սահմանը:

Աղետն արթնացրեց, ցնցեց աշխարհի խիղճը, մարդուն վերադարձնելով ի շրջանա բարության, մարդկային: Պատուհասված հայ ժողովուրդը եւ մի անգամ դառնում է աշխարհին ուղղված զգոնության, սթափության կոչ, բարության կամ, ինչպես հնում էին ասում, օճանի յուրովի ստուգության փորձադաշտ: Այնուհանդերձ, զոհողության, Աստծո սիրելին դառնալու քրիստոնեական խորհուրդն ընդունելով անգամ, բանաստեղծը չի կարողանում հաշտվել իրողության «առարկայական» դաժանության հետ, որովհետեւ ինքը նահատակվող հոտի հետ է, մարդկային ցավերի ու աղաղակների ականատեսը: Եվ եթե մի կողմից՝ նա մխիթար ու ուժ է տեսնում Տիրոջ մեջ՝ նրա «մարդեղության այս սուրբ օրերին», ապա մյուս կողմից՝ երևան է հանում դիմադրական ազգային ոգին՝

Ծակատագրի հետ ես չեմ հաշտվում,
Ընդվզում եմ ես, անվերջ բողոքում...

Իսկ ահա «Բողոք» բանաստեղծության մեջ Ն. Վանականը քննում է երկրաշարժի բերած բարոյագիտության լծակները՝ կյանքի ճշմարտության և հասարակական արդարության նժարները: Անէրկբա ու հատու է բանաստեղծի գրիչը. Սոցիալիզմը, ընդդիմանալով քրիստոնեության մարդերգության և Աստծո պաշտամունքի հայտնի կարգախոսներին, մղվեց ականա, բայց և բուր թամառությամբ սպանելու մարդու մեջ խիղճը, բարության հունդը, երջանկության խորհուրդը: Հետևանքը որոշ է. հասարակությունը, լայն իմաստով՝ «աշխարհն է դարձել նյութապաշտ, անկուշտ, խիղճ ու գութ չքվել»: Սթափ գրչի տակ դատապարտվում են հասարակական կյանքի բոլոր ինստիտուտները, հոգու և մարմնի բազմատեսակ լկումները: Նորոգ իսահակյանական հայտնատեսությամբ Ներսես Վանականը բացում է կեղծիքի ու ստի վրա հիմնված մեր կոմունիստական ներքինը.

Ամեն բանից վեր շահն իրենց դասում,
Ծահատակում են, խտիր չեն դնում,
Չկա՝ սրբություն, չկա՝ ուխտ, խոստում,
Չկա՝ ոչինչ սուրբ, ոչ մի համոզում:

Ո՛ր ենք մենք հասել և ո՛ր ենք գնում.

Ո՛վ պիտի ցնցի, սթափեցնի մեզ,

Որ անդրադառնանք ու շուտ ետ դառնանք

Անդնդի եզրից, նորից մարդ դառնանք:

Այստեղ բանաստեղծի ուժն է: Ի տարբերություն սակայն Ավ. Իսահակյանի գեղարվեստական մտայնության, Ն. Վանականը չի փախչում մարդկանցից դեպի անապատ, ավազուտներ: Եվ ինչպե՞ս հեռանա, չէ՞ որ իր ժողովրդի հովիվն է, անգամ պատվազուրկն ու անբարոյականը, գողն ու մարդասպանը հասարակական այս պայմանների պտուղն ու զոհն են, որ գրեթե ազգովին «դավանանում ենք մեր իդեալին»: Հոգևորական բանաստեղծը, իհարկե, պատասխանատվությունից խուսափելու իրավունք չունի: Ընդհակառակը, նա որոնում է իր մեղքի բաժինը՝

Մենք երկուսով էլ, օհ, մեղավոր ենք,
Բավ է կեղծելով մենք միմյանց խաբենք ...

Բարձրաստիճան լուծումներ չկան այս բանաստեղծության մեջ: Կա պարզ ու լուսավոր ճշմարտությունը՝ հավատի վերհայտնաբերումը մեր մեջ, աշխարհիկի ու նյութականի ստորադասումը հոգու և խղճի, աստվածայինի դիմաց: Սա միայն քրիստոնեականի վերահաստատումը չէ, սա մարդու և մարդկայինի կենսական ճանաչումն է, որը կարող է գալ ինքնամաքրումից հետո.

Դա՛րձ իմաստության և զգաստության
Ծանի՛ր քեզ նորից ...

Մարդու մղումը դեպի գեղեցիկը բացում է նրա մշտաբթուն երկվությունը, որ դեռ դարեր առաջ Գ. Նարեկացու ստեղծագործական ներհան զգացումների դաշտն էր: Այսօր էլ նույնն են հոգևոր տառապանքի սահմանները, հոգու և մարմնի կոիվը, ուր շատ հաճախ բևեռացման շփոթը սուաջացնում է մեր պոեզիային այնքան ճանաչելի տարուբերումները: Ն. Վանականի մի շարք բանաստեղծություններում («Մի՛ մերձենար յիս», «Հոգևոր խոհեր»-ի զանազան հատվածները, «Աղոթք առ Էջմիածին») քնարական հերոսը մաքառում է այս աշխարհի հույզերի և երկնային ճշմարտության միջև: Բնության կամքը հաղթահարելու ճանապարհով միայն կարելի է մերձենալ, հպվել աստվածային էությանը:

Այնուհանդերձ, կյանքի գեղեցկությունը վեր է ամեն ինչից: Գեղեցիկը բարին է, գութը, իսկ նրանց միասնությունն արդեն աստվածահաճ է: «Լեմանի ափին» բանաստեղծությունը արևածագի հրաշալի պատկեր է, ուր արևն ու լիճը հաստատում են աշխարհի ու բարձրագույն զգացումների հավերժությունը: Սերը լայն նշանակությամբ՝ դեպի մարդը, բնությունը, աստվածայինն ու խորհրդավորը, որը պիտի մեկնել քրիստոնեական պայծառատեսության իմաստի ներքո: Բնության խորհուրդը մարդկային կյանքի հետ կապված է նաև «Իմ նշենին» հուզաթաթալ բանաստեղծության մեջ: Ծաղկած նշենին այստեղ ևս համեմատության նույն զուգահեռներն է գծում՝ որպես հարս, զարթոնք: Ընդհանրապես Ն. Վանականի բնապատկերները թարմ են, իրենց պարզությամբ համակող և, անտարակույս, հոգեխորհուրդ: Պատկերի ավանդական սուրյեկտները չեն խանգարում գեղարվեստական ներքին նոր կապերի հյուսման, նոր հուզական իմաստների ձևավորման բանաստեղծի փորձին: Եվ այստեղ մենք տեսնում ենք նրա գեղարվեստական յուրահատուկ մեկ գիծը: Ահա, խնդրեմ, մեկ օրինակ:

Եվ մի զեփյուռ մոլորուն՝ ճյուղերի մեջ նշենու
Թափառում է ու հուզում ծաղկած ուտերն սպիտակ,
Փրփրում է նշենին, ալիք-ալիք պսպղում,
Զրերն ինչպես Սևանի՝ կապույտ, անամպ երկնի տակ:

Այստեղ ծանոթ են զեփյուռը, նշենին, որ ծաղկել է, սակայն վաղեմի բանաստեղծական «առարկաները» շարժվում են բոլորովին նոր տարածության մեջ, նոր զուգահեռականներում: Անակնկալ է ճյուղերի ալիքվելը,

փոփրալը, որը հանգեցրել է Սևանա ջրերի արդեն նորահայտ համեմատությանը:

Բնության հորդուն պատկերները որոշ իմաստով ուղղություն են հաղորդում գեղարվեստական մտածողությանը, համակարգում խոսքը, սրում նրա հեռագնա սլացքը՝ պահելով ընթերցողին հմայքի հարատևության անտես հյուսվածքում: Ասվածը տարածվում է «Տարերքի երգով», «Նոնենիս», «Մոլորված մեղուն», «Արփայի հովտում» և այլ երգերի վրա: Անմոռաց է հավերժության հետ քայլ պահող Արփան՝ լեռնային գետը, որի բացած ճանապարհը բանաստեղծն աննկատելիորեն համեմատում է ժողովրդի երթի հետ՝ վերջին տան մեջ կերտելով ժողովրդական ակունքին փարվող քնարական հերոսի հայտնության նոր վիճակը, որը և՛ իմաստալից է, և՛ աստվածային:

Իմ սիրտը պապակ՝ կարոտով անհուն,
Դարավոր երգիդ թովչանքով զեղուն,
Եկել-նստել է հովտում երկնային,
Իր հոտը գտած եղնիկի նման:

Աստվածայինի և բնության թեմաները, մեր կարծիքով, գերիշխում են Ներսես Վանականի ստեղծագործական աշխարհում: Դրանց միջոցով նա հիմնականում հաղորդակցվում է մեծ աշխարհին, գեղագիտական հարցադրումներին: Հենց այս հանգամանքը առավել տարողունակ է դարձնում այդ երկու թեմաների ընկալումների դաշտը, լայն խորքով է բացվում պատկերի, բառի ենթիմաստը: Սուղ միջոցների օգնությամբ, համենայն դեպս, հայոց առաքելական Եկեղեցու նշանավոր արքեպիսկոպոսը տալիս է իր վերաբերմունքի, իր գնահատությունների գունեղ ներկայանակը, այն տպավորում է, մնում բանաստեղծության սիրահարների ազդեցության ոլորտում:

Գեղարվեստական մտածողության հոգևոր «պատուհանը» բաց է կրնկի վրա: Այն հրավիրում է զրույցի, ամրակայում հավատը: Հովվական երգերում հայրենիքը հողի և ոգու միասնության փառաբանումն է: Սուր հասարակական հայացքը շիտակ ու պայծառ, դարձի բերող և ներող խոսք է:

Եվ ի վերջո, ամենագլխավորը. Ներսես Պոպագալյան-Վանականի երգը, եթե տազնապներ ունի, ապա միայն հոգու անաղարտության պաշտպանության ու վերադարձի համար: Այդ տազնապից է սնվում սերը դեպի մարդը: Այդ սիրուց էլ սկսվում է հոգևոր այն մեծ ճանապարհը, որ տանում է դեպի մարդկային կատարելատիպը, դեպի ինքնամաքում:

Բանաստեղծությունը երթ է առ Աստված:

Անվախճան այդ երթի ուխտավորներից է Ներսես Վանականը:

Աստված օգնական: